



GLORIA IN
EXCELSIS
DEO

ET PAX
IN TERRA
HOMINIBUS
BONAE VOLUNTATIS

29

NEDÁL 1944

Giasàcc i pracc. L'è la nòt dè Nedàl,
brache dè stèle sö nêl ciêl zelàt
dè 'n nègher dè vilüt. Nêl cascinal
un ròs dè fónne e gnari radünàt;

un ròs dè fónne strache e stomegàde
da quatr'nagn dè la guèra, i patimènc,
del laurà nei ciós, da le zornàde
lónghe, coi pign seràcc e strècc i dènc.

Ma chèsta l'è Nòt Santa e alùra töcc
i sta vizi al Presepìo pèr fa festa:
sés portogài, dés pòm tòch e 'n picol möcc
dè galète e dòpo... amò pèr chèsta

pòera brigàda, èn bèl pó dè billine,
che le sarà 'l piö bù dè la baldoria!
Nêl stansù grand tre o quàter strupiline
le brüza nêl cami: gh'è un pó dè gloria

dè s-ciupiti e falle, perchè anche 'l söch
tròp pesèn, èl s' è ormai töt cönsömàt
prima dè mezanòt. Atènti: èn ciòch!
Sito! Che 'l campanil èl gh' à sunàt...

Nêl gran silènsio adès 'na picinina
(piö picola dè töcc) la sè fa aànti,
Gesù Bambino nè la sö manina;
entùren töcc i pòpi, e pò töcc quanti:

la pòsta èl Re dènt nè la mangiatòia!
Nêl còr sèmpè dè grancc e picini
sè ripèt èl miràcol dè la giòia
e chèi öcc i par pié dè sterlüzì.

Entùren a la vècia lampadina,
col paralòm smaltàt dè blö e dè bianch,
s' è furmàt 'na curùna cilstina
pèr chèl Chèl che vegnerà a versà 'l sö sanch,

curùna dè fiducia, dè sperànsa
che càsa via ògne triste sentiment.
Tanta luce la gh' à 'mpinit la stansa!...
...! è mia piö asé gnanche l' oscüramènt!

Ugo Pasqui 1990